



元寇紀略

坤

伊5
3659
2 止



信 伊 5
3659
2 止

奇 不 虎
賞 香
樓 志 三

信 伊 5

元寇紀略卷下

江都 大橋順周道甫 著

後宇多天皇

建治元年乙亥

宋德祐元年元至元十二年

春正月高麗王諶

遣金方慶印公秀如元上表曰小邦近以征討倭

邦修造戰艦丁壯悉赴工役老弱僅得耕種早早

晚水禾不登場國用彫弊况兵傷水溺不返者多

雖有遺噍不可以歲月期其蘓息也若復舉事日

本則戰艦兵糧實非小邦所能支也伏望俯收誠

信夫恕
軒藏弁

欵元冠始末為王植遣金方慶然王○二月元主

復使禮部侍郎杜世忠兵部郎中何文著計議官

撒都魯丁齋書通好于我○三月元使抵高麗高

麗令舌人郎將徐贊及梢工上左等三十人導行

○夏四月十五日丙辰元使達長門室津既而移

筑前太宰府帝王編年記曰正月十八日蒙古高麗人等自鎮西赴關東恐誤考元史

元主發使在二月而東國通鑑云三月抵高麗則

豈有正月至我之理我但編年記云七月蒙古使

者赴關東亦如前程則當時太宰府分其使者兩

次送之鎌倉而編年記誤以其一次為正月之事

邪蒙古寇紀曰保曆間記關東評定傳並云至長

門室津而不載移太宰府事然帝王編年記云自

鎮西赴關東將軍家譜云鎮西護送蒙古高麗人

則自室津移抵太宰府可以見矣蓋古者待外國

自有規制筑前置太宰府以掌其事是以他土或

有至即拒而不納率至太宰府以受其進止則為

自室津直赴

鎌倉者誤也

○五月北條時宗令長門周防安藝

備後結番警衛要害曰有夷賊來宜戮力防戰焉

○秋八月太宰府護送元使杜世忠等于鎌倉帝王

編年記係七月廿一日

蓋發太宰府之日也

○九月七日甲戌北條時

宗斬元使杜世忠等五人于龍口梟其首帝王編

年記為

九月六日又作蒙古使等九人恐誤今從保曆間

記關東評定傳北條九代記曰杜世忠年三十四

歲何文著年三十八歲都魯丁三十三歲書狀官

薰畏國人果三十二歲徐贊三十三歲元冠始末

曰東國通鑑云至元十六年七月倭人皆殺之惟上左等四人逃還元史圖書編並云至元十七年二月日本殺國使杜世忠等蓋十六年始達高麗十七年元人知之也○將軍家譜鎮西要略以斬杜世忠為弘安三年之事大誤乃減省公私用費權停京師大番

兵以輦下人代之簡選勇士分遣鎮西以戍邊○

冬十月高麗以金光遠為慶尚道都指揮使修戰

艦以元將復舉兵於我也○十一月始置鎮西探

題以前上總介北條實政為之以備元寇○十二

月北條時宗令西海將士曰明年春將發兵征蒙

古宜修戰艦備器械簡水主元寇始末曰當時記載簡略此事僅存于

古簡未聞發兵征海外豈不果討邪東國通鑑云至元十七年倭賊入固城漆浦遣大將軍韓希愈

防守海嶋又選忽赤巡馬諸領府二百人分守于

慶尚全羅道倭賊又寇合浦乃遣大將軍印侯郎

將池瑄告于元元史高麗傳云十九年以日本寇

其邊海郡邑燒居室掠子女而去請發蒙古軍五

百人戍金州又月魯不花傳云為山南道廉訪使

浮海北而往道阻還抵鐵山遇倭賊船甚眾乃挾

同舟人力戰拒之倭賊給言投降弗納於是賊即

登舟攫月魯不花令拜伏月魯不花罵曰吾朝廷

重臣寧為賊拜邪遂遇害同舟死

二年丙子宋景炎元年元春正月朝廷命僧修熾

盛光法禳元寇○秋八月北條時宗令南海山陽

兵戍長門備元寇

三年丁丑宋景炎二年元春正月朝廷始十二社

祭儀一月一社以祈弭外寇○夏六月太宰府奏

胡元益猖獗趙宋殆亡是以我商舶貿易於彼者

畏難遁歸按元史日本傳曰十四年日本遣商人持金來易銅錢許之蓋我舶之通於彼

者其意在宋而不在元是其所以聞宋亡遁歸也然元人不知之以為求貿易於己則今年已許之

明年又諭沿海官司通我市船其意專在欲探知我情耳

弘安元年戊寅宋祥興元年元秋七月高麗王

如元王謀以至元十年謁元主曰日本一嶋夷耳恃

險不庭敢抗王師臣願更造船積穀聲罪致討元

主曰歸與宰相熟計遣人奏之○冬十一月元立

淮東宣慰司于揚州以阿剌罕為宣慰使諭沿海

官司通我邦市舶

二年己卯宋祥興二年是歲宋春二月元命揚州

湖南贛州泉州四省造戰船六百艘以將復寇我

也○夏六月元將夏貴范文虎使周福藥忠及渡

宋僧本曉房靈果通事陳光等齎書來廿五日辛

丑亦斬之博多○是月宋張世傑部下將校降元

乃命造戰船以從軍以高麗材用所出即其地製

之令高麗議其便以聞。○秋七月宋舊臣奉牒我
 曰宋朝既為蒙古所滅恐又危日本故告焉。○是
 月元又造戰艦。○八月范文虎言元主曰臣奉詔
 征討日本比遣周福藥忠與日本僧靈果齎書往
 諭其國期以來年四月還朝待其從否始宜進兵
 又請簡閱舊戰艦以充用皆從之。蒙古冠紀曰周福藥忠之來關東評定傳係之六月元史世祖紀係之八月差三月據評定傳云夏貴范文虎使者則遣之者實出於二人之意非元主之令也則知二人唯恐失其機會早已斷行之其至我在六月則發彼必當在春夏之交而文虎至其八月始入奏其事是其所以有齟齬也。○冬十月北條時

宗發遣關東士卒益鎮西戍兵。○是月元遣于丹
 赤塔納等如高麗督修戰艦又遣樊閏點視站驛
 高麗乃命王諱與塔納等督修戰艦于慶尚全羅
 道。○皇代記弘安二年條下曰蒙古軍船戰道筑紫蓋以四年之事為今年之事也大誤。
 三年庚辰元至元十七年春二月元始聞我誅杜世忠等
 忻都洪茶立請自率兵往元主姑緩之。○夏五月
 元又造戰艦三千艘命耽羅發材給之召范文虎
 議擊日本。○秋七月元括前願從軍者及張世傑
 潰軍使從行又命范文虎等招集避罪附宋蒙古

回回等軍。○八月高麗王瞻朝元言曰願以我軍鎮戍耽羅者補東征之師元主可之時忻都洪茶丘范文虎皆受元主畫策茶丘曰臣若不舉日本何面目復見陛下遂約曰洪茶丘忻都率蒙麗漢四萬軍發合浦范文虎率蠻軍十萬發江南俱會一岐嶋兩軍畢集直抵日本城下破之必矣乃以阿剌罕為右丞相范文虎忻都洪茶丘為中書右丞李庭張拔都參知政事並行中書省事○九月元遣也速達崔仁著以水韃靼之在開元北京遼

陽者移置東寧府將以赴日本之役也○冬十月北條時宗發西海道及阿波讚岐伊豫土佐兵屯博多令山陽山陰二道兵衛護京師東山北陸二道兵戍敦賀津以備馬○是月元遣使括開元等路軍三千從行至是得兵十萬命范文虎將之是為江南軍給洪茶丘所將新附軍鈔及甲○十一月高麗遣右承旨趙仁規將軍印侯如元上書中書省曰小國已備兵船九百艘軍一萬梢工水手一萬五千兵糧以漢碩計者十一萬以至器械皆

備庶幾盡力以報聖恩。但我國弓箭甲冑不足，乞賜甲五千，弓五千，弓弦一萬，且兵船九百艘，當用梢工水手一萬八千。今僅得一萬五千，其不足三千，於何調發？東寧府所管諸城及東京路沿海州縣多有梢工水手，伏望發遣三千補之。又小邦軍官於日本之役，累有戰功，未蒙官賞，乞追錄前功。令金方慶得參元帥府，朴之亮等十人為總管，趙抃等十人為千戶，金天祿等二十人為總把。又賜朴球、金周鼎虎頭牌，以勸來効。○十二月，元主冊

睹為開府儀同三司、中書左丞相、行中書省事，授印以金方慶管領高麗軍，都元帥朴球、金周鼎為昭勇大將軍，左右副都統並授虎頭金牌印，趙仁規為宣武將軍，王京斷事官授金牌印，朴之亮等十人為武德將軍，管軍千戶授金牌印，趙抃等十人為昭信校尉，管軍總把授銀牌印，金仲成等二十人為忠顯校尉，管軍總把。○日蓮註畫讚，鎮西圖並曰：弘安三年，蒙古來寇，是以明年之事為今年之事也。大誤。且註畫讚曰：其兵三百七十萬騎，大船七萬餘艘，亦妄誕矣。

四年辛巳。元至元十八年春正月。元主召阿剌罕范文虎等。同受訓諭。以拔都張瑄李庭留後。命忻都洪茶丘取道高麗陸行。是為東路軍。兵甲則舟運之。范文虎請馬二千。給禿失忽思軍及回回砲匠。元主曰。船戰安用。此不從。○是月高麗遣知密直司事韓康于忠清交州道。以備軍馬萬豆。○二月元授高麗元帥金方慶弓矢劍白羽甲。又授弓一千甲。胄一百絆襖二百。令分給東行將士。○三月元主給征東善射軍及高麗火長水軍鈔四千錠。以耽

羅新造船付洪茶丘。以刑徒減死者付忻都為軍。且諭范文虎等曰。彼留我使不還。故使卿輩為此行。朕聞漢人言取人家國。欲得百姓土地。若盡殺百姓。徒得地何用。又有一事。朕實憂之。恐卿輩不和耳。若彼國人至。與卿輩有所議。當同心協謀。如出一口。答之。仍申嚴軍律。乃給衣甲弓矢海青符。忻都洪茶丘先發。抵高麗。遂赴合浦。王暗令士卒。雖遭父母喪。過五十日者。即從軍。○夏五月。忻都洪茶丘及金方慶朴球金周鼎等。以蒙麗漢軍四

萬人戰艦九百艘發合浦廿一日丙辰來犯對馬
 及壹岐殺嶋民三百餘口慘毒尤甚嶋民乃挈妻
 孥走匿山中賊或聞兒啼即至焉至有父母殺其
 兒避之者少貳資時少貳經資第二子任龍造寺
備中守居肥後三船龍造寺
 季時龍造寺秀
家長子松浦氏彼杆氏千葉氏高木氏率
 兵數萬防戰於壹岐瀬戸浦斬賊將康彦康師子
 等賊登船樓發火砲我兵披靡資時死之○六月
 五日己巳戰於筑前志賀嶋敗之志賀嶋一作鹿
嶋見前東國通
鑑曰五月辛酉至日本世界村大明浦與倭交鋒
異稱日本傳曰世界與志賀音近今按圖書編所

載日本圖筑前有世加則世界世加皆志賀之寄
語耳但歷代皇記云六月五日戰於鹿嶋而東國
通鑑為辛酉據皇和通曆推之辛酉五月廿六日
則月日與皇記不符豈五月廿六日至志賀嶋與
我兵接鋒而六月五日亦戰於其地賊將洪茶丘
歟姑存疑以俟後考大明浦未詳賊將洪茶丘
殆為我兵所獲賊將王萬戶橫擊之我兵死者五
十餘人茶丘僅免六日庚午復戰大敗之時賊軍
中大疫死于兵與疫者凡三千餘人既而賊進至
宗像海先是筑前沿海地築砂石為壘高丈餘險
外易內難攀附而易騎登以便臨射北條時宗又
遣秋田城次郎盛宗等將衆師來督軍事及寇至

少貳覺惠其子景資大友藏人貞親賴泰子任出羽守菊

池武房赤星有隆葉室高善相知比山代榮石志

兼宇久競相知以下皆松浦黨田尻三郎種重其弟次郎種

光龍造寺季時其弟家益季友原田種元大村澄

宗嶋津氏等凡九國山陽南海諸將皆來會于太

宰府勢威甚嚴賊船不得近岸然我軍糧餉稍乏

人人危之草野次郎經長夜襲燒賊船一隻斬二

十一人賊大駭舳艫十里以鎖聯之為圍營外向

巨艦設石弩俟薄擊乃發我兵進戰者船小不能

敵前後襲賊者皆敗伊豫人河野六郎通有亦來

成博多嚮通有之發鄉也祈三嶋祠曰我待賊十

年賊不來則絕海伐之至是既八年會賊來大喜

與其子八郎通忠伯父伯耆守通時駕輕舸進戰

賊弩亂發部下四五人中箭斃通時被創通有亦

傷左肩不能彎弓右手揮刀而進賊艦高大不可

超乘乃仆帆樯為梯躍入船中手斫數人遂擒賊

將玉冠者而還通時病創而死大友貞親率三十

騎從斥鹵迫擊賊多得首級少貳覺惠力戰被重

創遂死。田尻種重、種光、城盛宗、家士新左近十郎、今井彦次郎、財部九郎等戰死。菊池武房、赤星有隆、將千餘騎破賊。有隆獲賊魁薩摩人武光三郎師兼、彌次郎清親、豐後人志賀太郎泰朝、天草人大矢野十郎種保、三郎種村、筑前人秋月九郎種宗、肥後人詫磨次郎時秀、大野小次郎國高、及竹崎季長、野中太郎長季、須田次郎秀忠、小野大進賴承、燒米五郎、宮原三郎等皆善戰有功。自五日至十三日，戰爭數回，賊不能得捷。○時諸州

人心洶洶，市無糶米，民有菜色。流言曰：賊指長門直犯京師。又轉擣東海、北海，廷議或謂宜召兵於關東，護衛京師。使丙二上皇後深草龜山避賊於關東龜山上。皇乃親詣石清水八幡祠，精禱一夜，又遣權大納言藤原經任於伊勢，奉宸筆，宣命于太神宮，祈以死代國難。據八幡愚童訓，謁八幡祠在六月廿日。據伊勢公卿勅使雜例，一代要記等遣經任在閏七月二日。今從增鏡，姑係于此。○初，元之發兵，諸將約曰：忻都、洪茶丘軍由高麗泛海抵壹岐，范文虎、李庭等軍由慶元至平戶，嶋嶋周圍皆水，且非其

所防可以屯軍船先據此嶋使人乘輕舟如壹岐
召忻都茶丘合軍共進為利必當以六月望前會
于此嶋阿刺罕行次慶元病發遂死元主命左丞
相阿塔海代總軍事未至范文虎等已航海而亦
未達至是忻都洪茶丘等相議曰嚮約江南軍與
東路軍六月望前會于壹岐嶋今南軍不及期我
軍先到大戰者數矣船腐糧盡其將柰何金方慶
不答經十餘日又議如初金方慶曰奉命賫三月
糧今一月糧尚在俟南軍來合而攻之得利必矣

諸將不敢復言既而范文虎以船艦三千五百艘
蠻軍十餘萬至次能古志賀二嶋忻都洪茶丘軍
乃來會焉能古嶋或作殘嶋以國音國訓同互用
隸早良郡蒙古寇紀曰考八幡愚童訓賊之來由高麗合浦者歷對馬壹岐至宗像由慶元者歷平戶鷹嶋等處至能古志賀二嶋於是東南軍相合為一矣其船凡四千四百艘其軍凡十四萬餘人
今按皇代略記曰賊船十萬七千八百四艘增鏡曰六萬艘太平記曰賊三百萬騎如是院年代記和漢合運並曰二十四萬人皆妄也惟年代記合運曰賊船四千艘北條九代記曰兵士十五萬人則殆得於是肥筑海上舳舻相銜我軍防戰屢敗其實矣
之斬招討使忽都哈思等忽都哈思月里麻思子也元寇始末為月里麻

思死于此賊以累失利乃移據肥前鷹嶋蒙古寇
 役者大誤肥前松浦郡御厨村北三里異稱日本傳云
 鷹嶋即五龍山在筑前託宣集所謂金海拾芥抄
 所謂見海即是也。是以今玄界嶋為鷹嶋恐誤
 今按筑前續風土記亦曰八幡愚童訓鷹嶋元史
 五龍山共今玄界嶋也。然關東評定傳見山影浮
 云肥前國鷹嶋則為筑前者未知是否。見山影浮
 波疑暗礁在海口不敢近會青龍見於海中硫黃
 氣盈乎虛空怪異百出賊帥見之大懼單艇先遁
 蒙古寇紀曰鎮西海上七八月間大風將起海鳴
 山震其響鐘鐺龍登虹現其氣腥臊或霾陰晝晦
 或焰蒸流朱或密雲橫馳或電雷閃轟種種變幻
 有不可得而形容者矣土俗見之輒為颶兆巫將
 繩索乘屋宇室竅隙闔牖戶以備其飄騰未曾為
 異也元賊之來偶始值此宜矣其驚愕恐怖也世

謂此等事為神
 軍誣妄甚矣
 ○秋閏七月甲子朔颶風大作海

水簸蕩賊船皆覆沒破壞左副都元帥阿刺帖木

兒以下溺死者無算按增鏡為七月朔脫閏字也

置閏七月元置閏八月所以差一月也又按皇朝

史略曰大風雨覆賊艦今考諸書太平記云大風

雷天地根元歷代圖錢函心史並云大風雨其他

群籍則無雷雨之說惟云大風破舟耳為風雨者

誤恐流屍隨潮汐入浦浦為之塞可踐而行海中積

尸望之如嶋漂流免死者尚數千人皆至鷹嶋繕

修壞船七八艘將逃歸少貳景資規知之率鎮西

兵艦數百掩擊殺傷溺死甚多請降者千餘人悉

斬之那珂川。瘞其屍於今津高麗寺。是時賊將范

文虎、李庭等船亦皆壞。庭抱船板，漂抵岸下，收其

餘衆。士卒存者十一二。由高麗北還。蒙古寇紀曰：元史李庭傳

云：東征日本，軍次竹嶋，遇風，船悉壞。今肥筑海無竹嶋，而相傳亦云。范文虎、李庭以兵十萬航海。

七晝夜至竹嶋。八月朔，颶風大作，士卒十喪六七。因謂竹嶋即鷹嶋。以國訓同，假借互用也。今按癸

辛雜識續集亦曰：大軍征日本，已至竹嶋，與其太宰府甚邇。夜半忽大風暴作，諸船皆擊撞而碎。四

千餘舟，所存二百而已。全軍十五萬人，歸者不能五之一。凡棄糧五十萬石，衣甲器械稱是。蓋以鷹

竹國訓相近，當時邦人互用。初，元都元帥張禧請之。而元人則皆用其竹嶋耳。

行。即日拜行中書省平章政事，與范文虎、李庭同

率舟師至肥前。禧即捨舟築壘平戶嶋，約束戰艦

各相去五十步，止泊，以避風濤觸擊。故及颶風作

禧所部獨完。范文虎等議還。禧曰：士卒溺死者半

其脫者皆壯士也。曷若乘其無回顧心，因糧於敵

以進戰。文虎等不從。曰：還朝問罪，我輩當之。公不

與也。禧乃分船與之。文虎等乘之去。餘軍在嶋者

四千人，乏舟。禧曰：我安忍棄之。遂棄舟中所有馬

七十匹，以濟其還。懷遠將軍楚鼎亦率千餘人從

文虎。遇颶，挾破舟板，漂流三晝夜，至一山。會文虎

船僅免。元軍不返者凡十萬餘人。高麗軍亦七千

餘人。東國通鑑曰。元軍不返者。無慮十萬有幾。我

軍不返者亦七千餘人。蒙古冠紀曰。忻都洪

茶丘所率東路軍四萬人。范文虎所率江南軍十

萬餘人。共十四萬餘人。此中一萬人乃高麗軍。而

喪其七千餘人。存者可三千人。元軍十三萬餘人。

而喪其十萬餘人。存者可三萬人。然則元史阿塔

海傳稱喪師十七八者。似得其實矣。今按諸書

往往云。元軍得生還者僅三人。誤也。說見于下。

八月。范文虎等達高麗合浦。遂收散卒西還。詐言

元主曰。至日本欲攻太宰府。暴風破舟。猶議戰。萬

戶厲德彪招討王國佐。水手總管陸文政等不聽

節制。輒逃去。故本省載餘軍。至合浦散遣還鄉里。

未幾。敗卒于閭脫歸。曰。七月至平壺嶋。移五龍山。

八月一日。風破舟。文虎等諸將各自擇堅好船乘

之。棄士卒十餘萬于山下。眾議推張百戶者為主

帥。號之曰張總管。以聽其約束。方伐木作舟。欲還

日本。人來戰。盡死。餘二三萬。為其所虜。至八角嶋

悉殺之。惟謂新附軍為唐人不殺而奴之。閭輩是

也。平壺嶋。即平戶嶋也。五龍山。不詳。異稱。日本傳

曰。五龍山。鷹嶋也。五。六之訛。龍。鷹之訛。析鷹字

為五龍也。未知是否。八角嶋。即博多也。武備志作

花旭塔。圖書編作法哈達。至八角嶋。悉殺之者。蓋

指誅降賊於那珂川也。那珂川。歷

博多。西入海。則以為博多亦宜矣。既而莫青與吳

萬五者亦逃還。按元史日本傳曰十萬之衆得還者三人耳續通鑑綱目曰得還者財三人蓋言范文虎所率蠻軍十餘萬中于閩莫青與吳萬五三人逃還耳非言元兵得生還者止三人也而諸書多以三人為元軍生還者之總數大誤。於是范文虎等皆獲譴貴張禧獨免元主乃怒其不得志復命阿塔海發兵一時無敢諫者江南諸道御史大夫相威遣人入言曰倭不奉職貢可伐而不可怒可緩而不可急向者師行迫期戰船不堅前車已覆後當改轍今為之計預修戰艦訓練士卒耀兵揚武使彼聞之深自備禦遲以歲月俟其疲怠出其不意乘

風疾往一舉而下之萬全之策也元主遂姑罷其役。○初元主之舉兵淮西宣慰使昂吉兒上疏曰臣聞兵以氣為主而上下同欲者勝比者連事外夷三軍屢劔不可以言氣海內騷然一遇調發上下愁怨不可謂同欲請罷兵息民不聽。元史日本綱目並係此事于至元二十年恐誤元史昂吉兒傳曰吉兒上疏請罷兵息民不從既而師果無功觀果無功一語則師行有期太常少卿王磐入諫在今一年者明矣。曰日本小邦海道險遠勝之不武不勝則損威臣以為勿伐元主怒曰非汝所宜言在吾國法言者

不赦。豈有他心而然耶。對曰：臣赤心為國，故敢以言。苟有他心，何為冒萬死而來歸乎。臣今年已八十，且無子嗣，他心欲何為。明日，元主遣侍臣以溫言慰撫，出碧玉寶枕與之。師果無功。○初，賊之至京師，守護下野守宇都宮貞綱受北條氏命，率兵六萬發。至則賊已敗矣，乃增築城壘，自志摩郡至宗像濱，令九國將士更番戍之。○冬十月，元置鎮邊萬戶府于高麗金州等處，以備我。元史世祖紀係十一月今

從東國通鑑

以敗卒後至者，分戍沿海。

其

五年壬午。

元至元十九年

春三月，高麗使上將軍印侯戍

合浦，以備我。○夏六月，我所虜蠻軍總把沈聰等

六人逃還于高麗，高麗遣印侯柳庇送之。元○秋

七月，高麗王睿遣使者如元，請自造船一百五十

艘，助擊日本。○九月，元命平濠高麗耽羅及楊州

隆興泉州造大小船三千艘。○是月，我所虜新附

軍賈祐者，逸還，詐言元主曰：為日本焦元帥壻，日

本知江南造船，遣臣來候動靜。元主給祐衣糧，異

日本傳曰：焦元帥不詳何人。此時北條氏為副元帥。焦字似條字，則蓋指北條氏也。○冬十

一月元中書省臣言天下重囚除謀叛大逆外凡犯死罪者令充日本占城緬國軍元主從之○是月元遣禿渾賀仲謙如高麗修戰艦○是歲遠江守北條時定為鎮西奉行居筑前姪濱以統轄軍事時定鎮西要略作為時日一說為時定螢蠅抄曰時定為時皆時氏男共任遠江守據尊卑分脉赴鎮西者時定也宜從一說

六年癸未元至元二十年春正月元復將發兵以阿塔海為征東行中書省丞相令高麗備糧二十萬石更發鈔三千錠糴糧以給軍匠命諸軍造戰艦習舟

楫○夏四月元以高麗王昡為左丞相命樞密院集軍官規畫事宜發所造回回砲及其匠張林等付征東行省給鈔及衣甲於諸軍御史中丞崔彧諫曰江南盜賊相繼而起皆緣募水手造海船民不聊生日本之役宜姑止之伺民之氣稍蘓我之力粗備而後東征未晚也元主不聽既而民間騷動盜賊頻發忽都帖木兒忙古帶乞益兵禦寇命以興國江州軍付之乃諭阿塔海曰所造戰艦宜少緩之所拘商船其悉給還○五月北條時宗遣

修理亮北條兼時於播磨以備外寇兼時明年十月遷為京

師守○冬十月北條時宗遷鎮西探題北條實政

為長門警固○是月元給征東新附軍鈔二萬錠

○十二月元又以茶忽所管軍六千人備征東○

是歲南海補陀寺僧如智言元主曰今復興師致

討多害生靈彼中亦有佛教文學之化豈不知大

小強弱之理如今臣等贊奉聖旨宣諭則必多救

生靈彼亦當懇心歸附元主乃使如智及提舉王

君治齋書來如智等宿留海上八月過黑水洋遭

颶風不得達我而還

七年甲申元至元二年春正月元復遣如智及王積

翁使我如智等由慶元航海至我近境舟中有怨

積翁者共謀殺之遂不果至癸辛雜識別集曰王

陵有任大公者家有四船王盡拘用之使行又於

途中鞭之任有諱語王聞之至骸山以好語官職

誘之且作大茶飯享之任亦作酒以報衆使醉飽

任縱兵殺之王竄匿於柁樓下任叱之曰奉使何

在猶佯笑曰在此出則叩頭乞命任顧其徒

鞭而擠之於水席卷所有寶物貨財而去○二

月元罷高麗造戰艦○冬十月元主復諭行中書

省曰軍行所用船艦及長年蒿手宜給鈔增價募

之。蒙古寇紀曰。元主從諸臣之言。欲寢兵通好。乃罷高麗造船。而積翁為舟人所害。事竟不成。故俄復增價收舟。○是歲北條時宗卒。其子左馬權

頭貞時代時宗為鎌倉執權。四月四日壬午。時宗卒。年三十四歲。七月

七日癸未。貞時為執權。

八年乙酉。元至元二十二年。冬十月。征夷大將軍惟康親

王令北條時定諭鎮西將士曰。堅壘壁嚴守防。以

備元寇。雖有事故。而不許赴於鎌倉。時定鎮西要略為為時。今

改之說。見于前。○是月。元復立征東行省。以阿塔海為左

丞相。劉國傑。陳巖。並左丞。洪茶丘。右丞。拘集諸處

漕船。高麗江南所造海船。又命習泛海者募水工

至千人者為千戶。百人為百戶。○十一月。元遣阿

八刺督江淮行省軍需。遣察忽督遼東行省軍需。

又遣使如高麗。命發兵萬人。船六百五十艘。助軍

行漕。江淮米百萬石。貯於高麗合浦。且令東京及

高麗各貯米十萬石。以備軍餉。期明年三月以次

而發。八月會合浦。○十二月。元增阿塔海戰士萬

人。砲手五十人。選壯士及有力家充軍。遣五衛軍

還家治裝。

九年丙戌元至元二十三年春正月元吏部尚書劉宣諫元主曰近復置征東行省再興日本之師此役不息安危繫焉唆都建議伐占城海牙言平交趾三數年間湖廣江西供給船隻軍須官民大擾群盜並起軍兵遠涉江海瘴毒之地死傷過半且交趾與我接境叢雨小邦遣親王提兵深入尚未見功唆都為賊所殺自遺羞辱况日本海洋萬里疆土濶遠非二國可比今次出師動衆履險縱不遇風可到彼岸倭國地廣徒衆猥多彼兵四集我師無

援萬一不利欲發救兵其能飛渡耶隋伐高麗三次大舉數見敗北喪師百萬唐太宗以英武自負親征高麗雖取數城徒增追悔且高麗平壤皆陸地去中原不遠以二國之衆加之尚不能克况日本僻在海隅與中國相懸萬里哉元主從其言姑命罷兵○鎮西要略曰弘安九年阿塔海率舟師自志賀嶋入寇縱火燒箱崎民家擊走之殺數百人此說可疑元史續通鑑綱目東國通鑑皆載是歲正月元主罷兵而我邦諸書亦不記阿塔海來寇之事則要略恐誤獨蒙古寇紀從要略曰元史世祖紀九月十月載高麗獻俘事則其有事於我者明矣然今考元史高麗所俘不過十數人蓋我邊隅之民劫掠彼境者耳未可據以為阿

塔海來寇之證也。其他要略所載七年十年入寇之事亦皆可疑。今以無徵不取。○冬十

二月。朝廷及北條貞時論功。行賞賜甲冑於赤星

有隆。肥前小崎鄉。加納下東鄉。於河野通有松浦

郡向邑。於相知比。神崎郡某邑。於山代榮薩摩鹿

兒嶋十分一。於田尻種長種重子也。弘安之役有功

被賞者非止此數人。然無記載可徵。則今舉其所見耳。且按藩翰譜。螢蠅抄。正應元年五年亦行賞

則此事蓋涉前後數年。不必皆為一時之事也。但其年月不可的知。而賜鹿兒嶋於田尻氏。則在今

年。故今貞時又令將士曰。既置鎮西奉行。自今而

後。防禦外寇。不從奉行守護命者。雖有功不錄。必

科其罪

十年丁亥。元至元二十四年冬十月。帝傳位于皇太子。

是為伏見天皇。○是歲元主問攻我事宜於哈刺

解。哈刺解應對甚悉。元主喜。授浙東宣慰使。

正應元年戊子。元至元十五年春二月。元復將舉兵於

我。以高麗王賸為征東行尚書省左丞相。東國通鑑係四

月。今據元史世祖紀。○冬十月。賜筑前三奈木莊某地。於志

賀太郎泰朝。七隈鄉某地。於武光三郎師兼比伊

鄉某地。於彌寢彌次郎清親。皆賞辛巳之功也。

二年己丑元至元二十六年春正月元遣張守智李天英

於高麗命督助征東軍糧○秋九月北條貞時廢

征夷大將軍惟康親王以皇弟久明親王代之

四年辛卯元至元二十八年民間流言元賊又來覬覦邊

陞朝廷及北條氏令諸社諸寺祈禳之據元寇始末是歲祈

禳事見常陸府中總社文書又螢蠅抄所載門葉記東寺文書興福寺唐院文書島津文書高野山

文書有正應二年三年五年六年祈禳事則前後比年行之也

五年壬辰元至元二十九年秋九月元遣洪君祥如高麗

問寇我王睹曰臣既鄰不庭之國庶當躬自致討

以效微勞乃先以監察御史金有成陞大僕尹為

宣諭使直文翰署郭麟陞供驛署令為書狀官齋

書以通好于我東國通鑑曰日本憾東征皆拘留不還二人存沒世不得聞按此事

他書無所見則二人之來否不可知惟北條九代記曰五年七月元燕公南獻牒狀十月高麗使金

有成等來明年送之關東然則北條氏亦誅二人而高麗以為我拘留之邪抑或歸途溺死海中而

高麗不知之邪公卿勅使參宮次第載明年癸巳宣命其文所謂去年冬蒙古奉書者似指二人所

齋則九代記未可必為訛說也姑書疑以質博雅○冬十二月初肥後球

磨人相良六郎賴俊防元寇有功至是北條貞時

奉久明親王命賜書賞之

永仁元年癸巳。元至元三十年春三月廿日丙子。大政官符尊伊勢伊雜社為伊雜宮。風社為風宮。更召僧於禁中祈降伏外寇。天皇親製文祭之。○是月元遣江南千戶陳勇等運米十萬石。高麗以將復犯我也。○秋七月八日壬戌。朝廷遣權大納言藤原為兼於伊勢奉宸筆宣命于太神宮。其文曰。朕忝稟苗胤。謬守神器。去年冬。蒙古奉書不遜之甚。至以干戈。要和好。安危難決。理亂叵辨。緯既起于文。永延及今日。將卒戍鎮。衆庶苦役。加之天屢呈

變地。頻示妖災。旱涉旬稼穡不登。是則朕薄德所致。職由失其柄。宗廟不祐。賢臣不佐。而今而後。興廢繼絕。道祖宗之道德。帝王之德。故今齋戒。凝念懇祈。皇太神。即遣使薦庶品。尚神靈。攘災孽。撥逆亂。寶位無動。海內清平。願垂靈睭。○八月元遣萬戶洪波豆兒如高麗。管造船。寶錢庫副使瞻思丁管軍糧。高麗乃分遣人于諸道。以備船糧。○是歲鎮西奉行北條時定卒。以越後守北條兼時。兵庫頭北條時家。並為鎮西探題。北條貞時令九國將

士曰防禦外寇宜一心從二人指揮鎮西要略以兼時為探題

之始。然建治元年置探題。以北條實政為之。則非始今年也。

二年甲午元至元三年春正月元主忽必烈死廟號

成祖子真金先死孫鐵木耳嗣時高麗王王在元

王。去。年。改。名。距。欲陳舉兵不便會元主死洪君祥與丞

相完澤謀遂罷寇我

三年乙未元貞元年春三月鎮西探題北條兼時有

病還于鎌倉帝王編年記。北條九代記。係四月。以鎮西要略係五月。今從尊卑分脉。

修理亮北條定宗代之夏四月北條時家亦還

于鎌倉○秋八月北條定宗卒于鎮西

四年丙申元貞二年北條貞時復遷北條實政為鎮

西探題鎮西要略為去年事。今從帝王編年記。

六年戊戌元大德二年秋七月帝傳位于皇太子是

為後伏見天皇

正安元年己亥元大德三年春三月元江浙平章政事

也速答兒勸元主復用兵元主曰今非其時也乃

使江浙釋教總統補陀僧一山齋書來其書曰有

司奏陳向者世祖皇帝遣補陀禪僧如智及王積

翁等兩奉璽書通好日本咸以中途有阻而還爰
 自朕臨御以來綏懷諸國薄海內外靡有遐遺日
 本之好宜復通問今如智已老補陀寧一山道行
 素高可令往諭附商舶以行庶可必達朕特從其
 請蓋欲成先帝遺意耳至於惇好息民之事王其
 審圖之一山至太宰府太宰府送之鎌倉北條貞
 時激怒竄之伊豆拘管不報後一山為貞時所貴
 重住鎌倉巨福圓覺
淨智諸刹又奉後宇多上皇命住京師
 南禪建仁文保元年十月寂年七十一
 三年辛丑元大德五年春正月帝傳位于皇太子是

為後二條天皇○秋九月鎮西探題北條實政削

髮辭職以其子政顯為鎮西奉行實政辭職鎮西
 要略係之明年

今從帝王編年記○冬十二月太宰府奏元船一艘至薩

摩甌嶋其在海者可二百艘甌嶋吉續記作子敷
 嶋以國訓同互用之

然竟不入寇蒙古寇紀曰一山入海杳無消息故
 復舉兵不向筑前而至子敷嶋者此

嶋與慶元路正相向且欲乘其無備也元史不載
 之以其無功也元寇始末曰常陸府中總社文書

載正安三年十二月異國降伏祈禳事又宗像社
 文書有同年同月宗像大官司職為異賊防禦被

還補之文蓋自此之後無復邊陲之報元寇始末
 在此時也

譜云應永六年蒙古兵船到對馬讚岐守宗貞茂
 合戰敗之二十六年蒙古復到仁位鄉貞茂亦敗

之皇代記。皇代略記。神明鏡。後崇光院御記。會津塔寺長帳亦皆載二十六年蒙古來戰于對馬。然此時元已滅。則不知蒙古指何國也。按東國通鑑。洪武二十二年。慶尚道元帥朴歲以兵船一艘。擊對馬。燒倭船廬舍殆盡。此事在應永六年之前。或言之乎。胡元終不能得志於我者。蓋北條氏之功云。

野史氏曰。甚矣我戎狄之嗜利黷武。而不知贖也。元主雄悍桀驁。乘三世餘烈。戰勝攻取。威風動天下。固非庸常之主。惟其嗜利黷武之心。則根於天性。終其身未嘗小變移焉。初命阿合馬奏括天下戶口。至藥材權茶。亦纖屑不遺其所

施設。專以培克聚歛為事。繼用盧世榮商稅田課。凡可以罔利者靡不搜括。後又用桑哥理算。六省錢穀。天下騷然。此其嗜利貪得。牢固不可破。而又玩兵黷武不已。當其初視宋為敵國。恐不能必克。則尚有慎重之意。及既滅宋。遂視戰勝為常事。幾欲盡天之所覆。以稱雄於千古。乃興安南占城緬國瓜哇之役。無歲不用兵。而又移其餘餒于我。其意蓋以我為海心。孤嶋可彈指定之也。殊不知我日出之國。皇統蟬聯萬

古不替土壤富沃人心忠烈決于取舍而明于死生有非萬國所翹企者安可使羶裘之徒逞其猖獗哉雖然當時朝廷專事禮讓計議謀畫一無所聞終至擬報答苟微北條時宗斷然沮朝議却彼使聘以執勝機於未戰之前吾未知其所稅駕也夫用兵制勝之道在興士氣以一其心耳欲興士氣以一其心非雄斷為之則不可得焉時宗之却元使也天下之士必謂元大國也或將憤恚以舉兵我不可不豫戒飭於是

天下之氣已興而其心始一矣既而彼求通好愈勤而時宗拒之愈堅則天下之士又必謂元強虜也必將大怒以入寇防之亦死不防亦死我不可不決死待之於是天下之氣大興而其心益一矣是以元寇之至艨艟蔽海勢吞宇內而我兵敗之猶決積盈之水崩山漂石而不已是其致竒捷挫兇焰以保護金甌於無疆者皆由時宗雄斷為之則其功烈之大且遠謂之古今一人可矣足利義滿位列三公上而稱臣於

外邦修貢職受封爵不知辱國之不可復雪焉較之時宗以一陪臣任大事處大難確乎不惑者其得失懸隔洵為何如也然而論者或謂時宗拒絕元使猶之可矣至斬杜世忠等于鎌倉周福等于博多則徒激彼怒而速彼兵也其所行不亦已甚乎夫元主出於胡虜而奪人之國者妄不自揣其分欲恫喝我神聖之域我乃却其使不報待以胡虜者義固宜然也元主反興無名之師以剪屠我邊疆創痍未瘳復遣使

通問何其侮我之甚也時宗即誅其使以報彼殘虐而元主猶且不知省悟亦復致使以要我勢已至斯則雖不嗜殺而不得不殺也何已甚之有水戶義公著大日本史條論贊曰元挾強大之勢以臨我我屈伏以事之彼將責我以稱藩朝貢而陵辱誅求之無厭也夫赫赫天孫之胄臨馭瑞穗國代天子民之道固無假於彼而張夸辭以脅制我是欲蠻夷我也時宗執其使而戮之宣揚威武震懾外國其舉甚善矣彼

欲洩怒於我則我固有備選將蒐卒屯戍沿海
軍國之需一無所闕故元主大興舟師來寇而
卒不能得志雖由神明之祐颶風大發亦時宗
堅忍不拔之志與防禦得宜之所致也元主創
艾不能再舉時宗之功不亦偉乎源白石亦跋
元主書後曰文永弘安之間元主屢求我通好
彼自以謂隋氏故事耳安知彼此國體大有異
於曩時焉哉况於加之用兵乎當斯之時藩屏
邦家外禦其侮敬迓天威式遏寇虐功烈亦大
千載之論矣

我孔子曰微管仲吾其被髮左衽矣北條氏其
庶幾乎二家之言明快精到無復餘蘊可以定
千載之論矣

元寇紀略卷下終

四年	丁卯年	正月。黑的等至巨濟松邊浦。畏風濤之險而還。王植令宋君斐隨黑的如蒙古。不疏其故。○八月。蒙古復遣黑的等至高麗。曰。日本之事。一委於卿。卿體此意。以必得要領為期。王植乃不遣黑的等。使其臣潘阜持書使我。
五年	戊辰年	正月。潘阜來。前奉蒙古及高麗書于太宰府。太宰府致之鎌倉。○二月。鎌倉執權北條時宗進其書京師。○三月。朝廷命菅原長成草答書。下之鎌倉。時宗陳其不可。抑而不遣。潘阜不得報而還。○四月。朝廷遣藤原通雅於伊勢。奉宸筆宣命于宗廟。○六月。發山陵使。告蒙古事于七陵。○蒙古遣吾都止如高麗。閱戰艦軍額。○九月。蒙古復遣黑的等使我。命高麗導之。○十一月。黑的等抵高麗。○十二月。高麗使申思佐陳子厚潘阜導黑的等。
六年	己巳年	三月。黑的等來對馬。島土人拒而不納。黑的等虜嶋民二人而還。○四月。高麗遣申思佐從黑的如蒙古。獻所執二人。○六月。蒙古命高麗金有成高柔。送還對馬人。且令中書省牒我。○八月。金有成高柔來太宰府。奉蒙古高麗書。還所執二人。亦不報。

七年	庚午年	十二月。蒙古復遣可使我者。趙良弼請行。蒙古主憫其老不許。良弼固請。乃授秘書監。充國信使。遣之。
八年	辛未年	正月。趙良弼抵高麗。○九月。高麗令徐稱金貯尊趙良弼使我。其船至筑前。今津。太宰少貳經資往求書。不與。曰。往獻之王所。不然不釋手。但出其錄本授之。即達之鎌倉。北條時宗奏之京師。亦以書辭不遜。不答。時宗令鎮西將士曰。聞蒙古欲來寇。故今發遣兵士。宜與守護人務防禦。○十二月。有司遣人送良弼於對馬。○朝廷遣藤原公守於伊勢宗廟。告蒙古難。○蒙古以是歲十一月建國號曰元。
九年	壬申年	正月。趙良弼還抵高麗。○二月。良弼使我賤民彌四郎等偕張鐸如元。偽稱日本使者。元主宴勞之。○高麗王植寄書于我。請通好。元不報。○北條時宗命將士警衛肥前筑前要害。○四月。時宗遣藤原景泰視鎮西將士懈怠。○彌四郎等還自元。抵高麗。高麗遣康之邵送還之。○五月。張鐸來致高麗書。請必通好。元亦不報。
十年	癸酉年	三月。良弼復來太宰府。竟不得入京而去。○六月。良弼還見元主。元主詢舉兵。良弼諫之不聽。○九月。元主命伯顏。諭襄陽生券軍。免其死罪。聽從日本軍。乃授鎧仗。

十一年	正月。元遣察忽如高麗監造戰艦。三月。元命忻都洪茶丘等將二萬五千人戰艦九百艘。期以七月取日本。○元遣使如高麗命發軍助擊日本。○五月。高麗王禎卒。元冊其子諶為國王。○八月。元將忽敦洪茶丘劉復亨等抵高麗。○十月。元兵一萬五千人。高麗軍八千人戰艦九百餘艘。來攻對馬壹岐。尋寇肥前筑前。我兵防戰甚力。然賊勢益熾。進陣于博多松林。我兵將退保水城。會日晚。賊退登舟。是夜大風雨。賊船多破。賊將墮水死。於是全軍乘夜遁去。太宰府發船追之。獲賊百廿人。悉斬之。○十一月。捷聞京師。朝廷奉幣十九社。
建治	二月。元主復使杜世忠何文著撤都魯丁齎書通好于我。○三月。元使抵高麗。高麗令徐贊上左等導之。○四月。元使達長門室津。既而移筑前太宰府。○五月。北條時宗令長門周防安藝備後曰。有夷賊來宜戮力防戰。○八月。太宰府護送杜世忠等于鎌倉。○九月。時宗斬杜世忠等五人于龍口。梟其首。乃減省公私用費。簡選勇士。分遣鎮西。以成邊。○十一月。始置鎮西探題。以北條實政為之。○十二月。北條時宗令西海將士曰。明年春將發兵征蒙古。宜修戰艦備器械。簡水主。
乙亥	二年
丙子	二年

後宇多天皇

三年	正月。朝廷始十二社祭儀。祈弭外寇。○六月。太宰府奏。胡元益猖獗。丁丑。趙宋殆亡。是以我商舶貿易於彼者。畏難遁歸。
弘安	十一月。元立淮東宣慰司于揚州。以阿刺罕為宣慰使。諭沿海官司。戊寅。通我邦市舶。
二年	二月。元命揚州湖南贛州泉州造戰船六百艘。○六月。元將夏貴范文虎使周福藥忠陳光及僧靈果齎書來。亦斬之博多。○宋張世傑部下將校降元。乃命造戰船以從軍。○七月。宋舊臣奉牒我曰。宋既為蒙古所滅。恐又危日本。故告焉。○元又造戰艦。○十月。北條時宗發遣關東士卒。益鎮西戍兵。○元遣于丹赤塔納等如高麗督修戰艦。
己卯	二年
庚辰	三年
辛巳	四年

三年 二月。元始聞我誅杜世忠等。忻都洪茶丘請自率兵往。元主姑緩之。○五月。元又造戰船三千艘。召范文虎議擊日本。○八月。忻都洪茶丘范文虎皆受元主畫策。○十月。北條時宗發西海道及阿波讚岐伊豫土佐兵屯博多。令山陽山陰二道兵衛護京師。東山北陸二道兵戍敦賀津以備焉。○元以兵十萬。付范文虎將之。是為江南軍。給鈔及甲於洪茶丘所將軍。

四年 正月。元命忻都洪茶丘取道高麗陸行。是為東路軍。○三月。忻都洪茶丘先發抵高麗。遂赴合浦。○五月。忻都洪茶丘及高麗諸將以兵

四萬人戰艦九百艘來犯對馬壹岐又戰於筑前范文虎亦以船三千五百艘鬻軍十餘萬至於是肥筑海上船艦相衝我兵勇鬪屢敗之賊乃移據肥前鷹嶋龜山上皇奉宸華宣命于伊勢宗廟祈以死代國難○閏七月朔颶風大作海水簸蕩賊船皆覆沒破壞溺死無算漂流免死者尚數千人少貳景資掩擊之殺傷甚多請降者千餘人悉斬之○八月范文虎等逃還皆獲譴責元主憤不得志復命阿塔海發兵相威諫之元主乃姑罷其役

五年壬午

三月高麗使印侯成合浦以備我○六月我西虜蠻軍總把沈聰等六人逃還于高麗高麗遣人送之元○七月高麗王曙遣使者如元請造船百五十艘助擊日本○九月元命諸州造大小船三千艘○十一月元中書省臣言天下重囚除謀叛大逆外凡犯死罪者令充日本軍元主從之○是歲北條時定為鎮西奉行

六年癸未

正月元復將發兵令高麗備糧二十萬石命諸軍造戰艦習舟楫○四月元集軍官規畫事宜崔或諫曰日本之役宜姑止之元主不聽既而民間騷動盜賊頻發元主乃緩其役○五月北條時宗遣北條兼時於播磨以備外寇○十月時宗遷鎮西探題實政為長門警固

七年甲申

○十二月元又以茶忽所管軍六千人備征東○是歲元主使南海僧如智及王君治齋書來二人宿海八月遭颶不得達我而還○正月元復遣如智及王積翁使我舟中有怨積翁者共謀殺之遂不果至○十月元主諭行中書省曰軍行所用船艦及長年蒿手宜增價募之○是歲北條時宗卒其子貞時為執權

八年乙酉

十月惟康親王令北條時定諭鎮西將士曰堅壘壁嚴守防以備元寇雖有事故而不許赴鎌倉○元拘集諸處漕船高麗江南海船又命習泛海者募水工○十一月元遣阿八刺督江淮行省軍需遣察忽督遼東行省軍需又遣使如高麗命發兵萬人船六百五十艘助軍行期明年三月以次而發八月會合浦

九年丙戌

正月元將擊我劉宣諫之甚切元主從其言姑命罷兵○十二月朝廷及北條貞時論功行賞貞時又令將士曰既置鎮西奉行自今而後防禦外寇不從奉行守護命者雖有功不錄必科其罪

十年丁亥

元主問攻我事宜於哈刺解哈刺解應對甚悉元主喜授浙東宣慰使

伏見天皇

正應二年

二月

元復將舉兵於我。以高麗王賸為征東行尚書省左丞相。

戊子

二年

正月。元遣張守智李天英於高麗。命督助軍糧。

己丑

三年

三月

民間流言。元賊復來覬覦邊陲。朝廷及北條氏。令諸社諸寺祈禳之。

庚寅

四年

五月。元遣洪君祥如高麗。詢擊我。王賸曰。庶躬自致討。以效微勞。乃

辛卯

五年

先使金有成郭麟齋通好于我。

壬辰

六年

大政官符。尊伊勢伊雜社為伊雜宮。風社為風宮。○元遣陳勇

癸巳

七年

三月。大政官符。尊伊勢伊雜社為伊雜宮。風社為風宮。○元遣陳勇

甲午

八年

正月。元主忽必烈死。廟號成祖。孫鐵木耳嗣。洪君祥與丞相完澤謀

乙未

九年

北條時家亦還于鎌倉。○八月。北條定宗卒于鎮西。

丙申

十年

北條貞時復遷北條實政為鎮西探題。

丁酉

十一年

三月。元也速答兒勸元主復用兵。元主曰。今非其時也。乃使補陀僧

戊戌

十二年

一山齋書來。一山至太宰府。太宰府送之鎌倉。北條貞時激怒。竄之

己亥

十三年

伊豆。拘管不報。

庚子

十四年

九月。鎮西探題北條實政削髮辭職。以其子政顯為鎮西奉行。○十

辛丑

十五年

二月。太宰府奏。元船一艘。至薩摩。觀嶋。其在海者可三百艘。然竟不

後伏見天皇

正安三年

三月

元也速答兒勸元主復用兵。元主曰。今非其時也。乃使補陀僧

己亥

三年

一山齋書來。一山至太宰府。太宰府送之鎌倉。北條貞時激怒。竄之

庚子

四年

伊豆。拘管不報。

辛丑

五年

九月。鎮西探題北條實政削髮辭職。以其子政顯為鎮西奉行。○十

于浮屠祈禳不亦可歎乎我友訥庵氏嘗
深疾戎狄貨利之說慨然著書膺之其辯
駁之餘今又記文永和安之事而北條氏
之偉績赫然明于天下則訥庵之功與夫
搴旗陷陣者可並轡而馳也嗚乎何代無
戎狄何代無良史後之為北條氏者必將
有感于斯編也九臯學人春田翬識

蘭洲川疇達書

癸巳歲
二月七日

